

Mid-Day Dogri News Bulletin, 17th June 2025

समै – 12:25

<><><><><>

एह आकाशवाणी जम्मू

PM-Arrival

प्रधानमंत्री नरेन्द्र मोदी साइप्रस दा अपना दौरा मुकम्मल करियै कनाडा पुज्जी गे न। इस बारे अपने सोशल मीडिया अकाउंट राएं जानकारी सांझी करदे होई मोदी होरें लिखेआ जे जी-7 शिखर सम्मेलन च हिस्सा लैने लेई ओह कनाडा पुज्जी गे न जित्थें ओह बक्ख-बक्ख कुल संसारी मुद्दें पर भारत दे बचार दुनिया दे लीडरें कन्नै सांझे करगन। मोदी होरें आखेआ जे ओह ग्लोबल साउथ दिएं प्राथमिकताएं गी बी शिखर सम्मेलन दरान उजागर करगन।

<><><><><>श

PM G-7

प्रधानमंत्री नरेन्द्र मोदी होर अज्ज संजा कनाडा च जी-7 शिखर सम्मेलन च शामिल होंगन। मोदी होर लगातार 6मीं बारी जी-7 शिखर सम्मेलन च शामिल होंआ करदे न। कनाडा दे प्रधानमंत्री मॉर्क कार्नी हुंदे साद्दे पर कनाडा दे दऊं रोजा दौर पर गेदे श्री मोदी होर शिखर सम्मेलन कोला बाहरें केई सारी दपक्खी बैठकां बी लांगन। प्रधानमंत्री मोदी होर महत्वै आली कुल संसारी मुद्दें पर अंतर्राष्ट्रीय संगठन दे प्रमुखें, जी-7 मुखें ते होर सद्दे गेदे मुखें दे लीडरें कन्नै बचार सांझे करगन।

<><><><><>

LG-Book Release

उपराज्यपाल मनोज सिन्हा होरें कल नमीं दिल्ली च मशहूर फोटू पत्रकार आशीष शर्मा हुंदी इक कॉफी टेबल बुक जारी कीती, जेहदा सिरलेख ऐ “रिड्मेजिसिंग जम्मू एंड कश्मीर”। इस मौके अपने संबोधने च उपराज्यपाल होरें आशीष शर्मा हुंदे कम्मे दी सिफत कीती ते आखेआ जे उनें अपनी इस किताब दे राएं जम्मू कश्मीर च 2019 च दफा 370 ढाए जाने दे बाद थमां लेइयै हुनै तगर होए दे बदलावें दा शानदार चित्रण कीते दा ऐ। एह कॉफी टेबल बुक राष्ट्र दे सामने जम्मू कश्मीर च पिछले 5एं बरें दरान होई दी तरक्की ते सकारात्मक बदलाव गी असरदार ढंगै सिर रखने दी कोश्ट ऐ। मनोज सिन्हा होरें अपने संबोधने च प्रधानमंत्री नरेन्द्र मोदी हुंदी सरपरस्ती ते मार्गदर्शन हेठ जम्मू कश्मीर प्रशासन आस्सेआ कीते गेदे जतनें गी बी उजागर कीता जिंदी बदोलत जम्मू कश्मीर दा त्हाल कुसै बी चाल्ली दे डर-त्राह, फरकोफरकी ते असुरक्षा दी भावना कोला पूरी चाल्ली मुक्त ऐ।

<><><><><>

Rana-TRI

जम्मू कश्मीर च जनजातीय समुदाय दी भलाई बेहतरी गी बढ़ावा देने दे मकसद कन्नै मंत्री जावेद अहमद राणा होरें जनजाति शोध संस्थान गी होर मजबूत करने लेई उपाएं बारे इक जायजा बैठक सद्दी। बैठक दरान मंत्री होरें इस इदारे दी जनजातीय समुदाय दी भलाई बेहतरी लेई अहम भूमिका उप्पर लोह पाई। बैठक दरान मंत्री होरें अधिकारिण गी निर्देश दित्ते जे सब्बने मुत्तलका धड़ें कन्नै रलियै इक व्यापक रणनीति तैआर कीती जा जेहदे च संस्थान दे

कम्मकाजें गी नमां रूप दित्ता जाई सकै। उनें एहदी असरदार अमलावरी लेई तफसीली रिपोर्ट पेश करने दे कन्नो कन्नी माहिरें गी इस कम्मं दी जिम्मेदारी सौंपने दी जरूरतै पर लोह पाई।

<><><><><><>

Satish JPDCI

काबिना मंत्री सतीश शर्मा होरें जम्मू च बिजली दी बंड सरबंधी मैहकमे दे अधिकारिए कन्नै बैठक लाइयै बड़ी मती गर्मी थमां राहत देने लेई मैहकमे आस्सेआ कीते जा'रदे जतनें ते कम्मकाजें दी समीक्षा कीती। उनें अधिकारिए गी हिदायत दित्ती जे जम्मू खित्ते च बिजली ढांचे गी बेहतर बनान ते उपभोक्ताएं गी सुद्दी मात्रा च बिजली दी सप्लाई उपलब्ध करोआना जकीनी बनान। बैठक दरान मंत्री होरें एह बी निर्देश दित्ते जे छम्ब हल्कें दे दूर दरेड़े ग्राएं लेई बाद्धू ट्रांसफार्मर बी तैआर रखे जान। एहदे अलावा मंत्री होरें बन्ने आले इलाकें दे विकास सरबंधी बीएडीपी स्कीम तैहत जारी परियोजनाएं दे विकास कम्मं दी तफसीली रिपोर्ट पेश करने लेई निर्देश बी दित्ते।

<><><><><><>

Women World Cup

अंतर्राष्ट्रीय क्रिकेट काउंसल नै इस ब'रे भारत दी मेजबानी च होने आले महिलाएं दे इक रोजा अंतर्राष्ट्रीय विश्व कप दा कार्यक्रम जारी करी दित्ता ऐ। आईसीसी नै एहदा एलान करदे होई दस्सेआ जे प्रतियोगिता दा पैहला पैहला मैच भारत ते श्रीलंका बश्कार खेड्डेआ जाग। 30 सितम्बर गी शुरू होने आली एह प्रतियोगिता 2 नवम्बर तोड़ी चलोग ते एहदे मैच भारत ते श्रीलंका च करोआए जांगन। प्रतियोगिता दा मेजबान भारत ऐ पर भारत ते पाकिस्तान बश्कार चलै'रदी तनोतनी गी ध्यानै च रखदे होई पाकिस्तान दे सब्बै मैच श्रीलंका च खेड्डे जांगन। भारत ते पाकिस्तान बश्कार मैच 5 अक्टूबर गी कोलंबो दे आर.प्रमदासा स्टेडियम च खेड्डेआ जाग।

<><><><><><>

Prog. Ann(Yoga Day)

आकाशवाणी जम्मू दा क्षेत्रीय समाचार, एकांश अंतर्राष्ट्रीय योग दिवस पर 20 मिंटे दा इक खास कार्यक्रम पेश करा करदा ऐ। जेहदा प्रसारण 18 जून गी बडलै 7 बज्जियै 10 मिंट पर कीता जाग। कार्यक्रम च साढ़ियां परौहनियां होंगन मन्नी परमन्नी दियां योग आचार्य डॉ. सुजाता संथु। सुजाता होर साढ़े जीवन च योग दे महत्व बारे अपने बचार सांझे करगन। चर्चा दी मेजबानी साढ़े न्यूज एंकर श्रुति खजूरिया ते कुणाल श्रीवत्स करगन। एह कार्यक्रम तुस मीडियम वेव 303 मीटर यानि 990 किलोहर्टज ते एफएम 100.3 मेगाहर्टस पर सुनी सकदे ओ।

<><><><><><>

Yoga

क्रोएशिया च बी योग लोकप्रिय होआ'रदा ऐ। एह लोकें दे जीवन दा हिस्सा बना'रदा ऐ। प्रधानमंत्री नरेन्द्र मोदी होर कल उत्थूं दा दौरा करगन। एहदे राएं दौनें मुखें दे दपक्खी सरबंध मजबूत होंगन। मोदी होर त्रै मुखें दे अपने दौरै दे खीरले गेड़ च कल जगसेब पुज्जगन। जगसेब प्रधानमंत्री हुंदे सुआगत लेई पूरी चाल्ली तैआर ऐ।

<><><><><><>